

أنا مواطن



أنا عندي شارع

أنا عندي رصيف

باحاول اكسر في الموانع

يمكن اوصل للرغيف

عندي خشا.. عندي حيا

عندى كرامة.. أنا مش سخيـف

ما اقعدش على باب أي جامع

دا لإن انا مولود عفيف

لسه جوايا ربيع

ولسه خايف م الخريف

إيدي اقطعها قبل ما امدها

ولا اذلّها..

للي شايف..

واللي سامع..

أنا مهنتي مواطن ضعيف

ع القهاوي فجري ساطع

والشمس خلّتني المواطن النحيف

العمر رايح ولا راجع

أنا ليا خانة في الوطن دا

ولا انا مواطن كفيف

ولا نبتة غريبة طالعة في المزارع

ولا سحابة جيت غلط

والزمن دا كله صيف

بقيت بطل

في حكاية من قصص المواجه

أنا ليّا رقم وملف في الأرشيف

لكن...

أنا في البطاقة.. كلي طاقة

وصوتي طالع

مش بطالة ولا عواة

ولا كنت أبدًا شئ مخيف

أنا مواطن نضيف

ياخلق هووووه

أنا مواطن شريف

ما اعرفش ليه حسبوني ضيف